

Y'SHUA AS DIE EERSTE

Dis nie moeilik om uit die Skrif af te lei nie dat as daar van Y'shua as die "Eerste en die Laaste" gepraat word, dan het dit niks te make met die vraag "Van wanneer af bestaan Hy en tot wanneer sal Hy nog bestaan?" nie. Nee, Y'shua is die "Eerste" omdat Hy uit die dood opgestaan het en daarmee die "Eersteling" geword het van die wat uit die dode opgewek sal word en dus die "Eersteling" van die nuwe skepping waarvan daar telkemale in die Skrif gepraat word. En Hy is die "Laaste" omdat hy (deur die krag van sy hemelse Vader) die "laaste vyand", die dood, oorwin het en daarmee dus die "laaste sê" verkry het oor sake wat met lewe en dood te make het. In die volgende gedeeltes kan duidelik gesien word hoedat daar, elke keer wanneer daar van Y'shua as die "Eerste" en/of die "Laaste" gepraat word, ook van sy opstanding gepraat word: 1 Kor 15:20; 1 Kor 15:23; 1 Kor 15:26; 1 Kor 15:45; Mat 28:18; Joh 11:25; Hand 26:23; Rom 8:29; Efes 1:22; Kol 1:18; Opb 1:5; Opb 1:17-18; Opb 2:7-8; ens. Die feit dat Y'shua die "Eerste" en die "Begin" is, het verreikende implikasies vir ons as gelowiges. Kom ons kyk kortliks hierna:

Wat ons nou deurmaak, het Hy reeds ("eerste") deurgemaak.

Joh 15:18 As die wêreld julle haat, moet julle weet dat hy My voor julle gehaat het.

Mat 5:11 Geseënd is julle wanneer die mense julle beledig en vervolg en valslik allerlei kwaad teen julle praat om My ontwil.

Omdat ons later eerste sal wees, kan ons nou maar laaste wees.

Mat 19:29-30 En elkeen wat huise of broers of susters of vader of moeder of vrou of kinders of grond ter wille van my Naam verlaat het, sal honderd maal soveel ontvang en die ewige lewe beërwe. Maar baie wat eerste is, sal laaste wees, en wat laaste is, eerste.

Mar 9:34 Maar hulle het stilgebly; want hulle het op die pad met mekaar gepraat oor wie die grootste is. En toe Hy gaan sit het, roep Hy die twaalf en sê vir hulle: As iemand die eerste wil wees, moet hy die laaste van almal en almal se dienaar wees.

Ons het alle rede om onself eers aan die Meester te gee.

2 Kor 8:5 en het nie alleen gedoen soos ons verwag het nie, maar het hulself eers aan die Meester gegee, en toe aan ons deur die wil van Elohiem.

2 Kor 5:15 omdat ons van oordeel is, dat as een vir almal gesterf het, hulle dan almal gesterf het; en Hy het vir almal gesterf, sodat die wat lewe, nie meer vir hulself moet lewe nie, maar vir Hom wat vir hulle gesterf het en opgewek is.

Ons is die eersteling van Yahweh se skepsele.

Jak 1:18 Volgens sy wil het Hy ons voortgebring deur die woord van die waarheid, sodat ons as eersteling van sy skepsele kan wees.

Opb 14:4 Dit is hulle wat hulself met vroue nie besoedel het nie, want hulle is maagdelik rein; dit is hulle wat die Lam volg waar Hy ook heengaan; dit is hulle wat gekoop is uit die mense as eersteling vir Elohiem en die Lam.

Vir ons is Y'shua in alles die eerste.

Kol 1:18 En Hy is die Hoof van die liggaam, naamlik die gemeente; Hy wat die begin is, die Eersgeborene uit die dode, sodat Hy in alles die eerste kan wees.

Joh 3:30 Hy moet meer word, maar ek minder.

Ons kan ook van die eerste dag tot die laaste volhard.

Heb 3:14 Want ons het deelgenote van die Messias geword, as ons net die begin van ons vertrou tot die einde toe onwrikbaar vashou.

Luk 21:18-19 En geen haar van julle hoof sal ooit verlore gaan nie. Deur julle volharding moet julle jul lewe in besit kry.

Wat ons glo, is nie 'n "eerste" of 'n nuwe geloof nie.

1 Joh 2:7 Broeders, dit is geen nuwe gebod wat ek aan julle skryf nie, maar 'n ou gebod wat julle van die begin af gehad het. Die ou gebod is die woord wat julle van die begin af gehoor het.

2 Joh 1:5-6 Nie ... 'n nuwe gebod ... nie, maar een wat ons van die begin af gehad het: dat ons mekaar moet liefhê. En dit is die liefde, dat ons wandel volgens sy gebooië.

Ons glo soos daar aan die begin (heel eerste) geglo is.

1 Joh 2:24 Wat julle dan van die begin af gehoor het, laat dit in julle bly. As in julle bly wat julle van die begin af gehoor het, dan sal julle ook in die Seun en in die Vader bly.

Luk 9:44 Bewaar hierdie woorde in julle ore; want die Seun van die mens sal oorgelewer word in die hande van die mense.

Daar is 'n Leidsman ('n Eerste) wat ons kan navolg

Heb 12:1 Laat ons ook elke las aflê en die sonde wat ons so maklik omring, en met volharding die wedloop loop wat voor ons lê, die oog gevestig op Y'shua, die Leidsman en Voleinder van die geloof.

Joh 13:15 Want Ek het julle 'n voorbeeld gegee om, net soos Ek aan julle gedoen het, ook so te doen.

Ons leier is die Owerste (die Eerste) oor die konings van die aarde.

Opb 1:5 en van Y'shua die Messias, die getroue getuie, die eersgeborene uit die dode en die Owerste oor die konings van die aarde! Aan Hom wat ons liefgehad het en ons van ons sondes bevry het deur sy bloed

Opb 11:15 En die sewende boodskapper het geblaas, en daar was groot stemme in die hemel wat sê: Die koninkryk van die wêreld het die eiendom van ons Meester geword en van sy die Messias, en Hy sal as Koning heers tot in alle ewigheid.